

4508


✓


n.


not in
done



Call
me
8255 15







RESPONSE

A VNE EPI-
STRE COMMEN-
CEANT, SEIGNEVR
ELVIDE,

Où est traitté des massa-
cres faits en France, en
l'an 1 5 7 2.

PAR PIERRE BVRIN,
à Messire Guillaume Papon.

A BASLE,

PAR MARTIN COVSIN.

M. D. LXXIIII.

Case

F

39

326

15746a

THE NEWBERRY
LIBRARY

FR É R E & amy, Quand i'en veu de
mes yeux le carnage fait en nostre fa-
meuse ville de Paris, i'ouy plusieurs qui don-
noient leur iugement là dessus : mais il n'y
eut vieille patenotriere, ny pauvre rustique,
Prestre, ny Moyne, docteur ny escolier de
Sorbonne, ny autres des nostres ayant bonne
ame, duquel les entrailles ne feussent menées à
pitié, & qui ne pronostiquast, que Dieu feroit
bien tost quelque horrible vengeance de si exe-
crables malefices. De ma part, combien que ie
soye Zelateur de nostre religion autant qu'un
autre, & que ie visse les aduersaires d'icelle
ruez par terre : toutesfois pource que ie n'en
vouloye point aux personnes, & que telle fa-
çon de les opprimer estoit digne de tout blas-
me, & condamnable de toute condamnation:
i'en fus tellement estonné, qu'il me sembla que
nous fussions à la fin du monde, & en receu
autant de tristesse en mon cœur, comme il est
conuenable à un homme qui n'a pas seulement
la figure d'homme, & au dedans est du natu-
rel pire qu'une beste brute, mais qui vrayer-
ment est homme & humain. Alors ie n'auoye
garde de penser, qu'il se pourroit trouuer quel-
qu'un si deshonté, qui voudroit defendre tels
parricides en public: Je scauoye qu'à l'ombre

A ij

d'une eschole, souuent la ieunesse, pour exercer eloquence, traite les louanges de la folie, ou de quelque autre tel sniet reprocue. Mais de publier vn escript oppugnateur de toute humanité & vertu, & establis seur de vice, d'iniquité, de cruauté bestiale, & mesmes d'impiété: ie n'eusse iamais cuidoé que cela deust tomber en la pensee du plus grand Athée d'entre ceux dont le grand nombre des honnore nostre France, & ce siecle malheureux. Mais i'ay esté trompé: car i'ay veu une Epistre traduite de Latin en François, excusatoire des massacres faits au mois d'Aoust en ladite ville: & selon que ie suis curieux, ay tant recherché, que i'en ay scéu l'auteur. Il est des politiques, disant que leur corps étant a la Messe de leur gré & volonté, neantmoins leur ame est ailleurs: se dispensans de dire au plus loin de leurs pensee tout ce qui sert à leur auancement, desirant à ceux ceux qu'on appelle Huguenots, la victoire sur nous sans sueur & sans sang. Au demeurant en la doctrine de la Religion, accordant de tous points avec eux: mais pour le bien du repos qu'ils aiment sur tout, viuans comme nous, & en cest artifice constituans vn grand fondement de leur excellence par dessus l'un &

& l'autre party. Quand ils sont ensemble, ils
 s'applaudissent: mais quand ils sont à part &
 debatement avec leur conscience, ils sentent de
 terribles assauts, & neantmoins quand ils res-
 uienent en public, ils se voyent enuironnez
 des honneurs de count, ils s'oublent, ou dissi-
 mulent les pointures de leur consciences, &
 poursuuent tousiours leur train. En ceste ses-
 ete nostre epistolier n'est pas le moindre, ny en
 autorité, ny en art de rhetorique, comme son
 epistre monstre: sur laquelle i'ay fait des ani-
 maduersions: combien que ie preuise que si en
 chose si facile ie vainquoye, ce ne me seroit pas
 grand honneur: & si ie succomboye, ce me se-
 roit grande honte. Quoy que soit, il te plaira
 voir ce que i'en ay fait: & tu verras que com-
 me nostre homme est doux de sa nature, aussi
 ie le traiteray sans aigreur, & le reduiray
 sans grande violence a tel point que ses ar-
 mes luy cherront des mains. Assieds-toy donc
 ques, & regarde noz escarmouches par les
 treillis de ta fenestre. Ie m'en voy commencer
 de l'assaillir par la teste: dy-moy en bonne
 conscience, ô toy excellent personnage à des-
 guiser les veritez, & industrieux aduocat de
 mauuaises causes, pourquoy au tiltre de ton
 œuvre as-tu fait supprimer ton nom? Est-ce

pour n'auoir que faire d'honneur? Nenny.
 Car tu n'as pas l'estomach si desgousté, qu'il
 reiette l'honneur cōme vne viande fade: Mais
 comme les plus modestes philosophes, & mes-
 mes traitans du mespris de la gloire, ont de-
 claré leur nom, pour auoir honneur de leur
 bien-faits: aussi as-tu supprimé le tien, pour
 n'auoir point blasme de ce que tu as mal fait:
 Qui meriteroit bien que tu fusses flestri d'vne
 tache infame & orde: toutesfois ie pardon-
 neray à ton nom, puis que tu veux qu'il soit
 caché, & que par là tu te monstres tout honteux
 d'auoir fait vn tel ouurage. Quelque
 autre venant de l'eschole d'Aristote, te re-
 procherait, qu'il est mal seant à vn homme
 prouect en aage comme toy, d'estre honteux:
 car tu ne debuois auoir fait chose dont tu pen-
 ses auoir honte. Et quelque Catonien te de-
 mandera, Mon amy, qui te faisoit faillir?
 Mais ie n'vseray point de telle seuerité, & ne
 debattray point contre toy, mais seulement
 contre l'autheur de ton Epistre: car tu dis
 plus bas, que tu as prins ce labeur, seulement,
 pour obeir à ceux qui te peuuent commander:
 Et ie m'asseure que quand tu vois ton Epistre,
 tu en es tellement esmen, comme vne pauvre
 mere, quand elle voit, qu'au lieu d'un beau fils
 elle

elle a enfanté vne beste monstruense, & te fus
 ses volontiers auorté de ce genre d'escrit, si
 Iuno tel'eust permis, Or le mal étant fait, la
 nef étant rompue, il ne restoit que ceste ta-
 ble du naufrage, que ton nom fust ignoré. Ce-
 luy qui fait follement, cele son nom sagement:
 car encore qu'il oye mesdire de son faict, & que
 il en mesdieluy-mesme, il ne luy en peut chas-
 loir. Prenons ores le commencement de l'E-
 pistre. Tu te plains qu'il court de meschans
 bruits contre les massacreurs. Il est vray que
 ils parlent de choses meschantes, mais qu'ils
 soient faux, tu ne le dis pas: aussi ne faut-il,
 Car qui seroit si impudent, qui par sa langue,
 oseroit semer faux bruits par l'Alemaigne,
 nation non legere à croire, ny lointaine du
 pays, où les executions memorables ont esté
 faites, pour estre incontinent reputé vn mens-
 teur abominable, & pour estre griefuement
 puni par les loix estroittement obseruees au-
 dict pays? Qui seroit tellement contempteur
 de sa vie, qui controuuerait faux blasmes, &
 par iceux prouoquerait contre soy le iuste cour-
 roux des grands de la terre, lesquels n'ont ia-
 mais faict de flatteurs prouoquans leur lar-
 gesse par fausses louanges, & defendans leurs
 insignes meschancetez pour estre bien-venuz

& favori? On n'oseroit descourrâ son nom,
 escrire, ou de iour ouurir la bouche, pour men-
 tir des choses depuis trois iours en vn thea-
 tre esleue deuant les yeux de plusieurs grands
 peuples, faites par gens sans foy, sans Loy, &
 sans religion, qui ont commis les enormitez,
 desquelles l'infamie eternelle deriuera sur
 ceux d'entre nous qui ne les blasmeront infi-
 niment. Tu parles de la partialité des hom-
 mes. O l'heureuse partialité, si on se fust sepa-
 ré de la compagnie des sanguinaires! O la
 malheureuse consorce, quand on s'est assem-
 blé avec les brigans! disant, Venez avec
 nous, mettons embusches au sang, englou-
 tissons-les comme vn sepulchre tous vifs
 & entiers, comme ceux qui descendent en
 la fosse, &c. Et pleust à Dieu que ceste ligue
 fust finalement soule du sang qu'elle regorge,
 auquel la France s'en va noyée! Et pleust à
 Dieu que les partialitez premieres eussent
 duré, puis que souz pretexte d'allier les par-
 ties, se conuoit vn dragõ veneneux, qui main-
 tenant deuore ce florissant Royaume, & fait
 horreur mesme à Satan son pere! Pensez-
 vous, massacreurs detestables, qu'en haine des
 Huguenots nous trouuions bon, que vous
 nous ayez arraché l'oline des mains, & porté
 d'Italie

d'Italie des engins à feu pour nous remettre en plus grãde combustion que iamais ? Apres tu dis que nous auons de nostre costé aucuns hommes de bien & de vertu, lesquels parlant de ce faict, disent le laid estre beau, comme les forcenez amoureux. Quelle espece de gens de bien nous proposes-tu ? Quand on lira toute la philosophie, quãd on resueiltera toute l'antiquité, on n'en trouuera point de telle. Nous lisons bien, Malheur sur vous, qui dites le bien mal, & le mal bien. Mais pourquoy trauaillôs-nous iour & nuict, pour apprédre le vray, si les gens de bien embrassent le faux ? Or dy-moy, ie te prie, si tes gens de vertu gauchent ainsi de la verité au recit de ce faict, que doyuent faire les meschans, dont nostre parti abonde ? Ie le dy pour la verité, & suis bien certain aussi qu'il y a des bõs entre nous : & ceux-la ne se delectent point à mentir, ains condamnent apertement les massacres & les massacreurs. Ceux qui font autrement, font tresmal : & n'y a transport d'affection, dont tu les couures, qui les puisse excuser. Tu confesses qu'en la iournee des massacres, les audacieux ont sans loy & sans autorité commis plusieurs actes dignes de reprehension. Icy tu uses d'une figure appelee Appetissement. Car

tu denois dire qu'en ces iours-là les diables encharnez auoyent rompu leurs chaines, & commis par sanglante malice des maux innombrables dignes de toutes les peines infernales. Il me semble que ie tombe moy-mesme en la faute que ie repren: car ie dy peu au prix de ce qu'ils meritent. Mais qu'y feroye-ie, puis que nostre langue n'a point de mots pour exprimer suffisamment l'indignité de leurs faits inhumains. Tu dis qu'ils sont des nostres: mais ia pourtant ne m'aduienne que ie les vueille iustifier. L'aime mieux ensuyure Papinian, qui dit sur le visage de Caracalla, Il est plus facile de faire le mal, que de l'excuser. Je ne suis pas de ceux lesquels hayans l'un, trouuent ses vertuz vices, & aimans l'autre, trouuent ses vices vertuz. Si ie faisoye cela, tu me blasmerois, comme tu blasmois n'aguieres pour ceste faute aucuns de nostre parti, & voyois la faute d'autrui, non pas la tienne. Outre ladite figure, tu vses d'une finesse, sur laquelle tu as insisté depuis le commencement: c'est, que tu confesses & condamnes une partie du mal, pour te preparer le chemin à persuader que le demeurant du mal n'est pas mal. De ceste ruse l'inuenteur & pere de mensonge a usé de tout temps. Mais
ie

ie te prie, personnage excellent (car tu aimes mieux ce nom que le tien) où t'adresses-tu pour vsér de ruse ? Certes quand tu serois habillé de ruses de cap en pied , ce genre d'hommes appelez Huguenots , te mettroient tout nud sur le quarreau , pour estre ridicule aux passans par la vergongne de ta nudité : & ce ne seroyent point les vieux guerriers de leur troupe , qui ne voudroyent que te regarder d'un œil terrible pour te couvrir entierement de confusion : mais se leueroit quelque soldat din , qui te pourmeneroit de sorte , qu'en peu d'heure tu serois desfigurè de playes . Tu as veu aussi bien comme moy , de leurs iouueneceaux , discourans les plus hautes matieres avec tant d'eloquēce & philosophie , qu'ils nous sembloyēt estre miracles du monde . Ceux qui leur veulent mal de mort , encore confessent-ils cela d'eux . Ie dy donc , qu'ils te traiteroyēt en pietre , si tu n'auois vsé de bonne precaution , en te rendāt inuisible par la suppression de ton nom . En quoy ie loue ton aduis . Je te cognoy bien , mais ie ne leur en diray mot . Venons au reste . Peu apres tu opposes Justice à Raison . Le Roy (dis-tu) en feroit iuste & exemplaire punition , s'il ne craignoit que cela fust desraisonnable pour la circonstāce du faict . Qui en-

tendit iamais vn langage si perplex & tortu^s
 Dy-nous clairement si le faict tel qu'il est, est
 punissable ou non ? S'il n'est point punissable,
 pourquoy dis-tu qu'il le vouldroit volontiers
 punir ? S'il est punissable, où es-tu l'ustice, où
 es-tu maintenant, dame Iustice ? Ie crie tant
 que ie puis, mais tu ne m'entens point : car tu
 es trop loin. Et ce iour-là (dis-tu) le populaire
 estoit estourdi. Ie pēsoye que tu voulusses des-
 charger les meschātes humeurs des Chefs sur
 les membres inférieurs, iouxte la sentence, Les
 grands faillent, & de leur vice, les petits
 souffrent le supplice Mais apres tu adiou-
 stes indefinitement, Que les hommes estoient
 agitez de fureur & de rage. A diuise que tu
 comprēs souz le mot d' Hommes. Puis tu nous
 fais rire, quand tu veux assigner la raison de
 ceste rage. Qui penses-tu qui croye, qu'on en
 rage avec raison ? Tu dis que le Roy estoit en
 danger. Ouy, d'estre le plus heureux Roy qui
 iamais fust. Nous le voyons à present, & l'enf-
 sions veu si nous n'eussions en les yeux bande^x.
 Tu dis, Que ton naturel est humain, que tu
 en pleuras, que tu en cuidas mourir. Pleure
 encore, mais n'en meurs point : Car la Iustice
 n'en feroit non plus de cas, que des morts, pour
 lesquels tu as pleuré. Mais en la calamite
 d'aus

d'autrui, tes larmes furent incontînēt tariées.
 Tant y a, que leur sang meslé avecq le pleur
 des gens de bien, crie vengeance, que Dieu leur
 fera pour certain, & bien aspre & terrible:
 Mais ce n'est pas à nous de sçavoir les moyēs
 ny l'heure Tu adionstes que les inhumanitez
 & cruantez y estoient indifferēment exercees:
 Apres tu dis, Que le mal procedoit seulemēt
 de la legeretē du peuple. Tu reniēs à ce que ie
 disoye tantost, O pauvre populaire! il te faut
 un Tribun. car le premier ordre se descharge
 pour te charger. Tu te monstres plaisant,
 quand tu compares le peuple de Paris à une
 tempeste d'orage, & à un torrēt desbordē. Si
 tu n'escriuois à un Polonois, ie diroye que tu te
 moques de nous François, qui cognoissons bien
 ce peuple-là, & en pourrions alleguer beaux
 coup d'exemples. Mais pourquoy feriōs-nous
 demonstration de ce, que les chassieux voyent
 clairement? Tu dis, Que l'esmotion populai-
 re ne pouuoit estre arrestee par l'authoritē
 du Senat, ny par la cohorte Pretorienne, ny
 par la presence du Roy. A qui croirons-
 nous? à ce porteur, ou à l'auteur qui dit,

Quand en vn peuple grand sedition ciuile,
 A cruauté sanglante esmeut la tourbe vile:
 Les caillous, les brandons de feu volent par l'air,

Et l'horrible fureur fait les armes tranſler.
 Si d'adventure alors ſuruiuent quelque homme ſage,
 Homme de grauité, qui monſtre ſon viſage,
 On voit ce furieux caler voile, & drefſer
 L'oreille, pour ouyr ce qu'il veut prononcer.

*Mais qu'ay-ie à faire de te conuaincre? vers
 que ſoudain tu te contredis, diſcourât longues
 ment ſur la louange des François, touchant
 l'honneur & reuerence qu'ils portent à leur
 Prince. Tu monſtres bien que qui oppugne la
 verité, s'enferme luy-mefme, & ſe iette où il ne
 veut pas tomber. Ie t'attendoie en ce paſſage,
 duquel ie paſſe à ton narré. Tu diſ que l'Ad-
 miral vn des principaux officiers de la Cou-
 ronne, fut de guet à pand bleſſé d'un coup d'har-
 quebouze pres du logis du Roy, & que ceſte
 audace eſtoit vne offence faite cõtre la propre
 perſonne du Roy, & baſtante pour renouueller
 la guerre ciuile. Bon Dieu, quel crime tu nous
 narres! Quelle peine pourroit-on excogiter,
 pour dignement le punir? Car il a eſté le com-
 mencemẽt de precipiter le Roy & le Royaume
 du haut degre de ſa felicité. Mais qui a
 fait cela? qui a ſuyui ce meſchant? qui l'a ap-
 prehẽde? ou qui luy a fait ſon procez, au moins
 par contumace? Qui a fait iuſtice de luy, ny
 des auteurs & complices de ſa malheureuſe
 entrepriſe? Icy ta narration eſt muette: Si
 eſt-ce*

est-ce que traiter ce poinct estoit bien à propos, voire necessaire pour ta defense. Que dis-tu bon *Aduocat* ? c'est icy qu'il te faut faire teste, non pas te retirer aux cachettes de silence. Tu cõdamnes le faict: que ne cries-tu dõc selon le denoir de ton office, qu'il soit puni? car il en est meshuy temps. Mais ie recognoy que i'ay tort de te tãcer: Pardõne-moy, ie te prie: Car tu fais l'office d'un sage *Aduocat*, aimãt mieux te taire, que plaider deuant les parties. Je passeroye quelques entrees de ta narration, si elles ne faisoient grandemẽt contre toy: car tu dois scauoir que iamais cõiurateurs ne tindrent la facon que tu dis. Ceux qui veulent faire mal, ne menacẽt point. Ce mot est vulgaire, Tu me menaces, tu ne me feras point de mal. Mais au rebours, on scait que ceux qui ont conceu quelque meschancetẽ insigne, ne font point de branade: ains dissimulent, font bonne mine, cõtrefont les doux & les humbles, se cachent en leurs aguets, comme les bestes de rapine en leurs tãsnieres, se baissent le vẽtre tout plat contre terre, pour de plus grand force & violence se lancer sur la proye. Bref, ils sont gracieux, tant qu'ils ayent enfantẽ leur malheureux dessein: Et qu'ainsi soit, demande aux massacreurs. Mais venons au principal de ta

*defense. Assauoir, à la coniuration espouuan-
table, de laquelle tu es criminel, ô pauvre bon
hôme! car c'est toy-mesme qui l'as faite, elle est
de tō inuention, tu l'as couuee, tu l'as esclose: Il
te faut donc condamner comme coupable de
le Xe maiesté. Certes quand ie la lisoye, ie pen-
soye ouyr vn Sinon ayant les mains attachees
derriere le dos, & pronōçant deuāt les Troyēs
sa harangue, tissue de mensonges artificieuses:
Oubie vn de ces esclauēs, lesquels es Comedies
de peur des estruieres, enfilent cantelensmēt
vne longue trainee de bourdes longnemēt pre-
meditees. Mais pēs-tu, nouuel Anexagore,
que tu nous faces entēdre que la neige est noi-
re? Sommes-nous gens de delà l'eau? N'as
nōs-nous pas des yeux & des oreilles, pour sça-
voir ce qui passa, nous estās sur le lieu? Es-tu
charmeur ou enchanteur? Penses-tu que par
ignorance crasse nous ignorions ce que tout le
monde sçait? Les autheurs, les conseilliers, les
executeurs des massacres ont-ils pas escrit, &
parlé en tant de lieux? Ne se sont-ils pas glo-
rifiez que le massacre leur a serui d'une cu-
ree? N'ont-ils pas prins plaisir de descrire
leurs beaux gestes au long? & si leur recit est
comparé avec le tien, ils s'accordent comme
chiens & chats. Pēs-tu que ceux des nostres,
qui*

qui ont rien de bien au vêtre, te sçachent gré,
pour auoir fait la guerre aux reliques des tres
passez par fourbes? sur lesquels appuyant ta
cause, tu gastes tout. C'estoit assez & trop,
d'auoir mal fait, sans y adioindre le vain
parler. Certes quand ie t'ay representé à mes
yeux tel que ie t'ay cognu antresfois, ie n'eusse
pas pensé que tu deusses dire telles choses: mais
quand ie considere la qualité de la cause, dont
la deffense t'est commandee, ie ne trouue point
que tu peusses autrement dire. Tu as donc fait
rage de rhetoriquer: mais ce n'est pas tout.
car il y a des veritez si euidentes, qu'elles ne
peuuent estre obscurcies par langue quelcon-
que, tant soit-elle disert: & si ferme, qu'un
Aduocat de glace les retiendroit contre ton
effort. Bien est vray qu'il n'est rien si clair,
qu'on ne puisse mettre en question: Or si la
presente question pouuoit estre debatue par
arraisonnemens, ce me seroit plaisir de la de-
batre: mais comme elle gist en faict, & ne puisse
estre debatue que par, il est, non est, si est, & le
demeurant de la dispute usitée entre les ha-
rengieres de Paris, & tels conficts me soyent
infiniment odieux, ie me trouue en peine. Ie
pourroye bien au vray & au long deduire les
entreprises, les menees, & les exploits: & par

l'opposition de la lumiere, ces tenebres s'esua-
noiroient incontinent. Mais c'est un grand
ceuvre, qu'il vaudra mieux reserver à celuy
qui escrira l'histoire. Que me reste-il donc?
sinon de dire, que tu dis beaucoup, mais tu ne
prouues rien. Tu me parles bien d'une coniu-
ration faite: Mais dans combien? en un mo-
ment. Mais de quoy? de renuerser l'estat d'un
grand Royaume. Mais par quels? par ceux
qui estoient venuz aux nopces royales avec
le velours, non pas à l'effusion du sang royal,
avec appareil d'armes. Mais cōtre qui? con-
tre un Roy qui leur auoit fait plus de demon-
stration d'amour & de faueur, qu'ils n'auoyēt
iamais desiré, & (comme tu dis en vne autre-
part) qui les cherissoit comme ses mignons.
Mais en quel lieu? où ils s'estoyent souz la foy
du Roy, cōmis & exposez à la gueule de leurs
ennemis. Mais en quel temps? quand ils n'es-
toient pas un contre six mille: & quand bien
ils eussent esté de toutes parts du Royaume as-
sés en un lieu, ils estoient presque anean-
tiz en nombre d'hommes de guerre, par plu-
sieurs peries de batailles. Mais pour quelle
occasion? pour un coup duquel la guerison es-
toit prochaine. Où en es-tu maintenant ex-
cellent Rhetoriqueur? si ton Epistre farcie de
telles

telles bayes pouuoit rongir, elle auroit hôte de ta honte. Tu parles de trois delateurs. O que tu as dextrement choisi ce nombre ! non pour aucun mystere de la philosophie Pythagorique : mais chacun pent bien penser, pourquoy tu en as mis trois en ieu. Or dy-nous, qui sont ils ? nommes-les, tu n'as garde : ou si tu n'omes, tu nommeras quelques trespassez, tant tu es fin. Mais ie te deliure de peine : L'un s'appelloit Monsieur de Chimaire : l'autre, Monsieur Hippocentaure : l'autre, messire Ventivole : & afin que tu le sçaches, il y auoit un quatrieme, appelé monsieur de Nuguende. Tu leur faisois tort de supprimer leurs noms. Car ils meritoyēt non seulement d'estre nommez, mais qu'on leur dressast au Palais des statues de bronze, & cōme ils sont, ils seroyent tousiours hommes en figure. Aussi tu ne nommes point tes conuincateurs, fors qu'un : si meritoyēt-ils que leurs noms fussent dits, & grauez en lames de fer à perpetuelle ignominie. Mais laissons les tels qu'ils sont. Comment sçais-tu que tes indicateurs ont deféré ? tu nedis pas que tu l'ayes ouy, ny que tu ayes veu leurs depositions, ny que iamais on ait donné coup de plume pour les escrire. Tu en parles donc par ouyr dire : Car si tu le sçauois plus

certainement: certainement tu l'eusses dit, cō-
 me grādement seruāt à ta cause. T u dis qu'ils
 s'accorderent du faict, comme fleutes, en tous
 les pointts, grands & menus, principaux &
 accessoires. Il n'en falloit pas tant dire, pour
 bien venir à ton pointt. Car il y a tel accord,
 qui est grandement suspect de mensonge, & tel
 discord, qui deliure les tesmoignages de suspi-
 cion de faussete. Ceux qui sont exercitez es in-
 gemens l'ont ainsi trouué: & le bon S. Chryso-
 stome le scauoit bien dire, parlant de l'accord
 des quatres Euangelistes. Croy donc que s'il
 est rien de l'accord dōt tu parles, tes delateurs
 auoyent ensemble apprins leur rollet, & puis
 se présenterēt en Theatre, l'un apres l'autre,
 pour mieux iouer la Tragedie. Mais il est bō
 d'entendre commēt tu les fais parler. Ils ad-
 uertirent, dis-tu, le Roy, que sa maiesté, la
 Roynes sa mere, Messieurs ses freres, & tous les
 Princes du sang s'en alloyēt despeschez le len-
 demain. C'estoit donc fait des Princes, qui e-
 stoyent de mesme Religion avec tes coniu-
 rateurs, & ne leur cedoyent en Zele, & leur at-
 touchoyent d'affection cordiale, d'alliance &
 de consanguinité: D'autre costé, leurs plus
 grands ennemis, & Messieurs de Guise mes-
 mes denoyent estre espargnez; car tu ne par-
 les

les point que la coniuration fust contr'eux.
 Voy que tu ne parles trop, & ne parles pas assez. Tu dis qu'ils desconurirēt la coniuration faite, pour trāsporter la couronne de France ailleurs. Ceste delation ou n'est point, ou est fausse selon toy. Car tu parlois n'aguieres en tels termes, Que les François ne scauroyent aimer, ny endurer autre Roy, que leur Roy naturel & legitime. Or tu sçais bien de quelle nation estoient ces pauvres massacrez. Tu te enueloppes donc aux laqs de repugnance, si tu ne caches quelque secret souz ce mot de Roy naturel & legitime: duquel mot ie ne fui iamais desjunné. Aussi le mot d'ailleurs nous est obscur. Tu sçais que la loy dit, que qui tachel'honneur d'autruy, ne doit point vaguenander par l'incertain. Est-ce en E'spagne, que ceste Couronne deuoit estre trāsportee? Les E'spagnols aduouèront bien (au moins si ceux qui viennent de là, & ne sont point suspects, nous disent vray) qu'ils ont en horreur la memoire desdicts massacres: mais ny eux, ny leur Roy, ne t'aduouèront point, qu'ils ayent pretendu à ceste Couronne. Si tu le dis, garde de tomber en leurs mains: sinon, il te faut nōmer l'autre Prince estranger, pour lequel se faisoit la coniuration, non sans son intelligence, puis que le

profit, c'est assavoir la Couronne, luy en devoit
 revenir sur la teste. Il te faut declarer par
 quelles magies il dressa en si peu d'heure une si
 haute & si importante entreprinse: quels e-
 stoyēt ses Pacolets, ses volatiles ambassadeurs,
 & ses tourbillons. Car commēt penses-tu per-
 suader qu'une grande cōiuration a esté faite,
 si tu ne declares les moyens? Regarde en un
 miroir, & tu te verras bien laid: encores plus
 laid, si tu consideres que l'Admiral gisoit au
 liēt impotēt des deux mains. Il estoit donc en
 bel estat, pour conduire l'execution d'une si
 dangereuse forsaiture. Tu pouvois dire qu'il
 estoit gairi, & que pour la seureté de sa per-
 sonne, & la commodité de sa retraite, si mal
 succedoit, il auroit differé ladite execution ins-
 ques à sa guérison: On eust creu cela aussi bien
 que le demeurant. Maintenant ie te demande
 quelle recōpense a esté donnée à tes delateurs?
 Tu sçais que par les loix elle leur est denē: Tu
 sçais que Vultur ce messenger intelligent, &
 ministre de la cōiuration Catilinaire fut am-
 plemēt salarié, pour l'avoir indiquée: combien
 qu'il ne le fist pas de son grē: mais ayant esté
 surprins avec les lettres des coniurateurs ad-
 dressées à leur Chef. Toutesfois tu ne parles
 point que tes miserables delateurs, ayent esté
 recom-

recompensẽ d'un pauvre sold. A delateurs de vent, payemẽt de fumee. Le te demãde aussi, qui a iamais ouy dire, qu'entrepreneurs de crimes de leze Maieestẽ fussent poussez non par malice ne meschancerẽ, mais par colere & erreur, & qu'ils fussent gens de bien & craignãs Dieu, mesmes tresloyaux & tresaffectionnez seruiteurs du Roy? Iamais brigand inueterẽ, iamais homme pollũ de toutes sortes de sacrileges, iamais home extremement meschant, & abandonnẽ des medecins, ne tint ce langage que tu fais sortir de la bouche de tes delateurs. Il faut donc dire, qu'ils surpassent les meschancetẽ de tous les meschans. Et de ce ne faut douter: Car aussi tu leur fais dire deuant la face du Roy, que pour ne faillir de foy à leurs cõpagnons, ils eussent volontiers coupẽ la gorge à tous les viuans de la terre, sans excepter la Royne espouse du Roy, les Princes & Princesses du sang, pourueu qu'en ce massacre uniuersel, le Roy, la Royne-mere, & messieurs ses freres ne fussent cõpris. Quiconque parle ainsi ou il est forcenẽ, ou l'outrepasse des meschans, & pernicieux. Soit l'un, soit l'autre, ils ne sont point croyables: & toutesfois tu dis que sur telles delatiõs furent fondees les sentences, dont l'executiõ a fait decouler riuieres de sang par

toutes les parties de ce Royaume. Sur mes-
 chant fondement, meschât edifice. Tu dis que
 les delateurs deduisirent par le menu les cir-
 constances de la coniuration; mais tu te gar-
 des bien d'en exposer pas une. ce qui estoit re-
 quis pour biē défendre ta cause. Ie cognoy que
 d'un costé tu as esté aucunemēt consciētieux;
 & del'autre, tu as bien aduysé, que qui fait ce
 que tu fais, doit estre reſtraint en paroles, de
 peur qu'il ne se fourre d'oū il ne se pourroit
 pas desſeſtrier. Si tu eusses bien au long repres-
 senté la deposition de tes delateurs, tu m'eus-
 ses ouuert vne grande ſale d'escrime pour te
 choquer. Tu eusses dit, que la coniuration fut
 faite à minuit, en la garde-robbe, ſans lumie-
 re, en nombre de cinq ou ſix; & incontinent ie
 t'eusse entortillé en beaucoup d'absurditez
 & incompatibilitéz. Mais tu m'as bien deceu
 par ton ſilence. Ton Epiſtre eſt bien longue, ſi
 eſt-ce qu'il y a de grandes omissions: tu eusses
 bien fait, ſi de bonne heure l'eusses donnée à
 Vulcan pour la corriger. Tu parles de la de-
 liberatiō prinſe par les vieillards, nō pas ceux
 qui conſeillerent à Roboam de ſoulager ſon
 peuple, mais de ceux qui tancerent le Roy,
 pource qu'il ne vouloit eſtre Neron: mais tu
 ne dis pas à quelle heure fut tenue ceſte cōſul-
 tation

tation. Tu dis que finalement le Roy se laissa vaincre au conseil des malins. Comment dis-tu cela? veu que nous auons veu plusieurs lettres enuoyees par sa Maieste, où il desauouë tout le faict desdicts massacres: & mesmes dit, que pour asseurer sa personne de la violence des massacreurs, il fut contraint de se reserrer au Louure, avec le plus de garde qu'il peust. D'auantage, tu dis que le Roy en ladite consultation, remonstra, qu'il ne voudroit condamner personne sans l'ouyr: & profera autres telles sentences dorees, & dignes de l'Empereur, qu'on surnōma Philosophe. Qui pouuoit donc esbransler vn Roy fondé sur raisons si bonnes & si certaines? Cesse de nous vouloir persuader que de Roy il se fit Tygre. Nous à qui le nom de Roy est & sera tousiours sacré, auguste, & venerable, ne t'en croirons point. L'exemple domestique du feu Roy son pere, Prince tresdebonnaire, ne luy permet d'estre cruel. Si nous l'auons ouy de noz oreilles donnant le consentement que tu dis, encores derogerions-nous foy à noz sens, veu que par ses lettres il dit le contraire: ou dirions, que ceux qui luy demanderent congé de souiller leurs mains au sang de la Noblesse Françoisē, luy firent ceste demande, avec condition

que s'il vouloit, cela se feroit, & si non, aussi: Et que les armes, & les guerres civiles ont rendu si licentieux ceux qui sont autour de luy, que ils font ce qu'il ne veut pas, & ne font pas ce qu'il veut: Qu'ils ne reuerent son sceptre, ne sa Justice, pource que l'audace & la force sont deuers eux: Et toutesfois, de peur qu'on ne die que le Roy est dégradé de son authorite en effect, il dit contre son cœur, qu'il s'accorde à leurs mauuaises volontez. N'as-tu pas dit cy deuant, qu'il auoit fait tant de beaux decrets contre l'harquebousier qui blessa l'Admiral? & toutesfois rien de ce qu'il en auoit ordonné, ne fut executé. Et tantost tu diras, que tous les massacres, hors Paris, furent faits contre ses ordonnances expresses. Bref, il a veu, & void beaucoup de choses à son grand regret & desplaisir: Toutesfois il les souffre, pour n'y pouuoir à present remedier. Cependant il espere que Dieu le deliurera de ceste seruitude: & lors il fera justice. Nous auons tant cheminé, que nous sommes venuz aux boucheries de Paris, où, selon le conte de ceux qui disent le moindre nombre, fut tué en diuers iours de sept à huit mille personnes, sans respect d'aage ny sexe, de religion, ny d'estat: Les vns, apres auoir payé rançon, precipitez du haut de leurs maisons,

maisons , en iettant hurlemens espouuanta-
bles, comme ceux qui estoient dans le taureau
de Phalaris , creuerent miserablement sur le
pané. Les autres furēt occis d'autre façon, se-
lon l'appetit bestial de quiconque vouloit en
ces iours-la gagner le prix de cruauté. Et ad-
uint que qui monstroit son bras couuert inf-
ques aux esselles, de boudins, ceruelats, & sang
humain, estoit prisé plus que le Roy. Les or-
nemens du barreau, les perles des sieges indi-
ciaux, l'honneur des Academies, les colonnes
des sciences, la gloire des forts & vaillants, la
fleur de la vieillesse, la verueur de la ieunesse.
tout cela fut fauché par la fausse faux de ces
faussaires, traistres, & desloyaux Cannibales.
Leur bourrelerie ne s'arresta pas aux vi-
uans : mais fut exercée en infinité de sortes à
l'encontre des mort. On parloit auparauant
pour vn exemple de remarquable desloyauté,
des vespres Siciliennes : & à iamais on parle-
ra des matines Parisiennes, lesquelles furent
bien sonnees & brimbalees, non pour conuo-
quer les Parroissiens à la messe : mais pour con-
uier les bestes farouches à manger les hom-
mes. Ceste execution fut commencee le iour &
feste de saint Barthelemy : aussi estoit-il con-
uenable. Car en tel iour les tyrans infideles,

escorcherent tout vif ce bon saint, & le tourmenterent non comme vn homme, mais comme vne pauvre beste. Ainsi firent noz chaircuittiers, ayans surprins les pauvres gens gisans en leurs liets, chacun en son logis. Estoyeēt ils pas, à ton aduis, en bon train, pour exécuter ce mesme iour, la coniuration que tu as forgée? Tu dis, que quelques vns des conspirateurs eschapperent: Si est-ce qu'il estoit aussi aisé d'attraper les vns, que les autres. Il ne eust cousté non plus de les raffler, que de massacrer plusieurs des nostres, par haine ou enuie de butiner. Parquoy la cause desdicts massacres ne fut pas ceste tiennne coniuration, de laquelle il ne se parla vn seul mot, iusques apres le scandale horrible. Alors il falut inuenter quelque grand forfait, pour pallier la plus cruelle exécution qui fust faite depuis la constitution du monde, & adoucir les Princes estrangers irrités du cas: & craignans que le mal s'estendist en leurs territoires, comme il s'estendit par toutes les parties de la France, où les traces de Paris furent suyuiés. Car il y eut des porteurs de secrettes & sourdes commissions, qui presserent instamment la besongne, disans bien sçauoir de la vaine voix du Comettant, son intention estre, que tous fai-

faisans profession de ceste religion, ayans peu ou prou moyen de faire remuement, ensemble les suspects, fussent raclez incontinent, & sans delay, & n'en demeurast aucun de reste, si n'estoit quelque belistre avec ses galoches, pour seruir de mocquerie. A cause dequoy il s'en ensuyuit innumerables meurtres inhumains en diuers lieux du Royaume. Il se trouua en vne ville barbare que tu cognois bien, des mutins, qui attacherent aux replis de leurs chapeaux les oreilles des massacrez en guise d'esquissions. Voila comment la puissance des tenebres a este la source commune d'où sont deriuez les vns & les autres massacres, combien que tu en excuses aucuns, & condamnes tous les autres. Vray est qu'en l'exécution d'iceux, il y eut quelque diuersité. Car nous sçauons par bons aduertissemens, que hors Paris, il y eut des Courts de Parlement, qui ne consentirent point aux massacres, disans, qu'il falloit proceder contre les coupables par forme de iustice: toutesfois se laisserent esconler, & respondirent aux sollicitateurs de cruauté, Prenez-les donc vous-mesmes, & les crucifiez, noz mains seront innocentes de leur sang. Aussi nous sçauons qu'il falut en aucuns lieux auoir bourreaux de louage, Car

plusieurs mesmes de ceux qu'on estimoit les plus
 cruels, & les plus affectiōnez à nostre religiō,
 refuserent les charges de massacrer cōme in-
 dignes d'hommes. Mais à Paris rien de tout
 cela. Encores triumphes-tu pourtant, en fai-
 sant comparaiſon de Paris avec les autres
 villes. Si ailleurs (dis-tu) on a châtié les mas-
 sacres, ie ne vous en ſçauroye que dire, &c. Bō
 Dieu, quel homme tu es! Tantost tu ſçauois
 ce qui est autant caché, comme ce qui n'est au-
 cunement point, & maintenant tu ignores ce,
 dont la nouuelle certaine a couru par tout. Ie
 te feray donc ſçauoir, qu'on ne parle aucunes-
 ment de les châtier. Les eſtrangers s'en eſ-
 merueillent. Nous en ſçauons la cauſe, & en
 ſommes marries, ie dy, s'il y a en nous quelque
 ſcintille de vertu. Mais il nous faut attendre
 la ſaiſon, qu'impunité n'aura plus vogue en
 ce Royaume: Alors on fera des proclamatiōs,
 & y ſera obeï: on dreſſera des potences, & les
 coupables y ſeront attachez. Ce ne ſerōt plus
 masques, comme celles de Paris, que tu nous
 as cy deuant ramenteuës. Or ay-ie (ce me ſem-
 ble) ſuffiſamment châtié ta coniuration. Celle
 des massacreurs ſera punie quand il plaira à
 Dieu. Je ne reſpondray point aux flatteuſes
 louanges dignes d'un Gnaton courtiſan, où tu
 t'a-

s'amuses. Car il me souuient que quand elles furent leuës en presënce de quelques sauetiers, Sifflez, disoit l'un, Bouffez, disoit l'autre. Bref, la boutique ressonnoit de risce. Mais ie ne passeray pas vn beau mot que tu dis, Assa- noir, que depuis les premiers troubles, les cœurs des François ne furent iamais uniꝝ de plus grande liaison d'amour, qu'à present: A cause dequoy, par maniere de dire, les massacres estoient desirables. Ie trouue icy beaucoup de fautes. Je ne scay si elles sont tiennes, ou de ton translateur. Premièrement, chacun sent les effects contraires à ce que tu dis. Item, il te falloit estre memoratif de ce que tu auois dit au commencement, Que la condition de ce siecle est miserable, auquel se trouue tant de partialité. Item, Pren que ie soye en paix, pource que i'ay par violence tyrannique coupé la gorge à mes principaux aduersaires, & tiës le pied sur la gorge des autres, de sorte qu'ils n'osent se remuer: Diras-tu que leur cœur & le mien sont uniꝝ? Non. Car force, non pas amour, espouuantement, qui n'est pas bon gardien de duree, & non franc vouloir les contiët en subiection. D'auantage, disant que noꝝ cœurs ne furēt iamais plus unis, tu ne nies pas qu'ils n'en ayent esté autant. Pour n'auoir

rien de meilleur, falloit-il desirer les massacres ? Je croy que iamais tu ne fis tant de fautes en si peu de paroles. En apres, tu parles de quelques registres ; mais c'est à ta mode, passant par dessus, sans rien specifier. Si tu produisois quelque extrait ou abbrege d'iceux, nous les impugnerions. Puis me disant des sours, auxquels souuent tu auois fait la reuerence, & magnifié leurs gestes, tu resueilles la memoire des afflictions passees, contre les prohibitions du Roy contenues en ses Edicts. Et pourquoy ne le ferois-tu ? veu qu'en ce temps on estime seruir aux loix estre vne miserable seruitude. Mais vn iour le Roy aiguïsera la pointte de sa iustice à present rebouchee.

Venons en fin à tes arraisonnemens ; car il me tardoit que i'y fusse, pour auoir meilleur moyen de luieter. Et pour y paruenir, ie me suis iusques icy hasté legerement : mais à ce que ie voy, nous aurös bien tost fait. Car combien qu'en tes comptes fabuleux ton Epistre n'a esté que trop longue, quand elle vient aux raisons, elle est si racourcie, qu'elle trouffe & conclud briefuement son propos par trois petits pointts. Le premier, est vn exemple : Le second, vne Loy : Le dernier, vne raison. Or voicy

voicy l'auantage que ie te donne. Ie dy que quand toutes les choses contenues en ta narration seroyent vrayes, la procedure que tu louës est damnable, par les raisons & maximes de droit indubitables, que le Roy allegue en ton Épiſtre. Ausquelles tu opposes l'exēplo du Senat Romain, Lequel ordonna (ce dis-tu) que sans attendre autre confection de procez, le Cōsul feroit mourir incōtinent Lētulus, Cethegus, & les cōplices de la cōiuration Catilinaire. Pour te conuaincre sommairemēt & de plain, voy pres d'icy la boutique d'un Libraire: Entrons dedans, tu trouueras que ladiète cōiuration descouuēte à Ciceron Consul, par Fulvia, & par les ambassadeurs de la Gaule Transalpine, le tout par luy rapporté au Senat, & la cité étant pleine de bruiēt de ceste entreprise, la plus maudite qui fut iamais au parauant ces massācres : Catilina pourtant ne daigna bouger, aussi le Senat n'auoit rien ordonné d'aigre contre luy, Seulemēt (comme il auoit accoustumē es dangers extremes) auoit donné charge au Consul, de pouruoir à ce que la Republique ne tombast en aucun inconuenient. Ce qu'il feist diligemment, & sans tumulte ny trouble, donna tel ordre, feist si bon guer, & posa si bonne garde, que Catilina ne

peust mordre ne regimber. Cependant ce traistre faisoit l'assure', & le vingt & troisieme iour, apres auoir esté descouuert, osa bien entrer en la Court, pour donner sa voix au Conseil public. Mais le Consul cria tant contre luy, qu'il l'en feit desloger: & non seulement luy permit de sortir de la ville, mais l'exhorta de ce faire. Lendemain Catilina faisant semblant d'auoir peur, non de la Iustice, mais de ses ennemis particuliers, quitta la ville, pour s'aller ioindre à M^alius son cōpagnon, qui n'estoit pas loin, avec vne forte & puissante armee. Mais il laissa de bons Licutenants, garnemens semblables à luy, contre lesquels, sans les nommer, le Consul harangua au Senat: Toutesfois les pria de suynre leur Chef, se contentans de garder la Republique en secreté. Mais comme ils demeurassent obstinez en leur conspiration, & battissent le fer chaudement, & la ville s'en allast assaillir par dedans & par dehors: Toutesfois pource que les indices de la coniuration n'estoyent du tout si clairs comme le soleil du Midi, & qu'il se pouuoit trouuer quelque malheureux & perdu qui en eust douté, Le Consul n'osa mettre la main sur personne, insques à ce que par sa vigilante sollicitude, il attrapa la coniuration

toute viue, surprint les lettres & messagers, les ouyt & reouyt à part, & rendit indubitable ce qu'il scauoit desia. Alors il fait venir deuers soy cinq des coniurex, leur acare & confronte les indicateurs, tire de leur bouche la volontaire confession de verité: assemble le Senat, par l'aduis duquel met ces cinq en libre garde, chez cinq personages honorables de la ville: tire plusieurs copies des indications, escriptes de la main de cinq Senateurs, icelle diuise par tout l'Italie, & par toutes les prouinces, afin qu'il n'y eust personne qui reuouast ladicte procedure en doute & difficulté, mais que les coupables fussent condamnez par le iugement commun de tous hommes. Derechef consulte le Senat, lequel tout bien veu, disputé, & considéré, ordonna que ces cinq seroyent executez à mort, avec publication de leurs biens, & leurs complices pourroyent déposer les armes dans vn temps prefix: Quoy faisans, seroyent tenus pour immunes de ladicte conspiration. Cest arrest fut execute' contre les cinq, sur l'heure du vespre, en vn lieu secret de la prison: toutesfois il ne fut point touché à leurs biens. Voyla cōment avec vn peu d'eau, le Senat esteignit vn grand feu. Iuge maintenant s'il fit mourir les hommes soudainement,

sans confectiō de procez. Ie m'estahy de toy.
 Ce seul exemple iussiroit, pour massacrer les
 massacres que tu defens. Si tu continues, il ne
 faut que te laisser faire, pour auoir la victoire
 contre toy. Ie t'accorderay bien qu'en la sus-
 dicte procedure, la forme des iugemens crimi-
 nels acoustumee ne fut pas du tout suiuite.
 Dequoy plusieurs gronderent, mais bien vne
 plus exacte, moins suiectē à corruption de ies-
 moins & de iuges, plus aperte plus douce, plus
 longue, & autant contraire à celle des massa-
 cres, comme le blanc au noir: Car le pauvre
 Consul craignant de faire quelque faute à son
 coup d'essay, ne faisoit vn seul pas, sans l'aduis
 du Senat. Pour venir au second poinct, il faut
 proposer vne question, Si vn Presidēt de Pro-
 uince a bien & loyaument fait son procez à vn
 criminel, & l'a condamné à mort, & le crimi-
 nel appelle de sa sentence: Est à sçauoir si le
 President le doit executer, nonobstant l'appel.
 & la loy que tu allegues dit que non. Toutes-
 fois si contre vn criminel apprehendē en sedi-
 tion sanglante, ou briganderie manifeste, il
 execute deuant que la cause d'appel soit iugēe,
 non pour hastier la peine, mais pour preuenir
 quelque grand imminent peril, & incontinent
 s'en excuse enuers le Prince, & luy fait enten-
 dre

dre la cause quil l'a esmeu à ainsi passer outre,
 & elle est trouuee raisonnable: Et en ce cas
 l'execution ne luy tournera point à mal, pour
 dire qu'elle est attentatoire sur l'appel, & que
 le President n'a point deféré l'honneur qu'il
 denoit au Prince, auquel auoit esté appelé.
 Cela est vray: Mais si la sentence, & par con
 sequēt l'execution estoit iniuste, il faudra que
 monsieur le President porte sa teste sur vn es
 chaffaut. Or pour decider si ceste allegation
 sert ou dessert à l'excusation de noz massacres,
 pren tel iuge que tu voudras, ie ne le recuse
 point. Veux-tu que soit vn enfant? Ie m'y ac
 corde. Pour la fin, tu dis qu'il faut euitier vn
 extreme danger, & se sauuer des brigands par
 quelque moyen. Ie l'accorde, s'il est bon, expes
 dient, & loisible: Mais quoy que puisse adue
 nir, il ne faut riē faire de mauuais. Or s'il est
 mauuais, & contreuenant à tout droit diuin
 & humain, de condamner vn homme sans
 l'ouyr (ce que tu n'oserois nier, non pas le Dia
 ble mesme, car tous les liures sont pleins de ce
 ste reigle) Qu'est-ce de massacrer les hommes
 à milliers? les trancher à lopins à la façon de
 Medee, & à l'appetit de quiconque veut es
 sayer si son harnois coupe bien: couvrir la
 France de duel, la remplir de gémissements

de veſues & orphelins, violer par une enragée
 malignité les Edicts du ſouuerain Magi-
 ſtrat, rendre ſes commandemens ridicules,
 empuantir les airs de la corruption du ſang
 humain reſpandu comme eau au long & au
 large, remettre la barbarie en poſſeſſion, deſ-
 nuer le Royaume de ſes ornemens, le tout ſans
 aucune forme ne figure de iuſtice: & puis ſans
 aucune vray-ſemblance, charger de faux cri-
 mes, nommement un ſeul, imperſonnellement
 quelque peu d'hommes, Contre tant & tant
 d'autres cruellement occiſ ne pouuoir inten-
 ter aucune accuſatiō, non pas meſmes en men-
 tant, & toutesfois ne faire aucun ſemblant de
 vouloir punir, ny les miniſtres, ny les autheurs
 & cōducteurs de tant de maudictes meſchan-
 ceteſ: qu'eſt-ce autre choſe qu'un profond a-
 byſme de maux? O Dieu! qui nous en deliure-
 ra? Qui ſauuera ce peuple des malheurs qui
 luy pendent ſur la teſte? Perſonne: Car il eſt
 obſtiné, Il ha le col endurci, & ne ſe repen-
 point. Parquoy, ie n'eſtriueray plus, ie ne de-
 battray plus de choſe trop claire, c'en eſt trop
 battu. Ce que i'en ay fait ſoit imputé à ce-
 luy, qui n'a eu erubeſcence d'excuser, ce que
 tous les ſiecles condamneront.


Or puis que ie ne luy doÿ plus rien, & que
 ie


ie luy ay satisfait à tout, ie reuiens à toy, mon
 Frere & amy, & te prie, que quād tu seras en
 tes plus grandes deuotions, tu pries Dieu que
 les Turcs & infideles ne puissent iamais en-
 tendre l'histoire de ces massacres: ou s'ils l'ont
 entendue, qu'ils l'oublient incontinent, afin
 qu'elle ne leur soit en scandale & empesche-
 ment de se ranger à la religion Chrestienne:
 Et que les Chrestiens en facent leur profit,
 redoutans les iugemens de Dieu, lequel punit
 les reprouuez, leur ostant l'entendement &
 l'usage de raison, & les abandonnant au de-
 sir de leur sensualité brutale, de sorte qu'ils
 emmoncelent mal sur mal, & quand leurs mes-
 chancetez sont paruenues à leur comble, il les
 tourmente de toute rigueur, & leur fait com-
 mencer icy bas leur enfer. Aussi descouure les
 hypocrisies, & mesmes en ce monde punit ceux
 qui mettent leur confiance aux hommes, &
 s'appuyent sur des rouseaux casse: punit les
 maux secrets, & les autres que les Iuges de ce
 monde laissent impuni, & ne laisse pas d'en-
 uoyer la mort aux bons, pour les mettre en res-
 pos. Or quand le grand iour sera venu, il mon-
 strera aux meschans ceux qu'ils ont transper-
 eez, & lors il y aura du pleur, mais il n'en se-
 ra pas temps. Que la representation de ces

choses nous face penser de pres à nous, & nous
face dependre du Souuerain : à la conduite
duquel ie te recommande de tout mon cœur :
& te prie, Frere & amy, qu'en tes prieres il te
souiennne de moy. A Dieu.


De la Palisse, ces Calendes de Januier.

1573.















THE
NEWBERY
LIBRARY

